

杭州八旗駐防營志略

杭州八旗駐防營志略卷二十一

仁和張大昌輯

撰述志目

草竹軒詩集四卷

善泰撰

草竹軒詩餘一卷

善泰撰

草竹軒雜錄一卷

善泰撰

謹案善泰字仲憲滿洲鑲黃旗人康熙間奉

調征西藏屢著勞績由左營右翼協領升右  
營副都統嘉慶中孫玉麟以草竹軒三種進

呈

御覽

易學答問二卷

强謙撰

養竹山房詩二卷

强謙撰

蕉窗文章二卷

强謙撰

謹案強謙字毅齋又字文璽滿洲 旗人

居圻牆頭母病刺指書多羅尼大悲呪以祈  
壽病果痊深於易理工篆籀好吟詩府學生  
員歿於嘉慶辛未

詩序傳說編珠四卷

福申撰

路史編珠二卷

福申撰

諸子編珠四卷

福申撰

山海經分類編珠一卷

福申撰

清異錄編珠二卷

福申撰

鮑桂星序禹門太史從予游最久且篤貌清弱而胸有積卷叩之霏霏如屑玉尤工隸事妙語必偶予嘗歎升庵謝華啟秀一書屬對精確太史爲首肯越數日出一編見示乃所纂清異錄編珠也清異錄舉典多僻碎偶儷頗難太史搜剔幽隱掇拾奇雋隋掌湘佩纍纍乙乙若繩次

而髮聯然其於學也用心細而程力勤卽此可以得其梗概矣

魏茂林序余性嗜搜討嘗纂類海探源一書於事之出處展轉沿訛者竊有所是正其中多新雋可喜者擬爲今異錄如千卷又取其便駢儷者比而輯之爲玉合鴻儲如千卷然皆僅得其槩均未暇卒業也今年夏禹門侍講以所撰清異錄編珠屬爲校刊受而讀之其代山妃對一一如己心之所欲而未能出者其書之新雋可喜不待言抑其用心可謂勤矣然後賞人之嗜

好之同者有如此也侍講所輯駢語甚夥此特其一班他日彙而刊之當益有以暢觀者之意余書幸未成且覆瓿矣

方輿類聚四卷

福申撰

方輿類異二卷

福申撰

增刪干支便覽二卷

福申撰

干支類編二卷

福申撰

自序丁年甲帳權輿於唐嗣王荆公以三甲對  
六丁陸放翁以丁卯橋對子午谷世豔稱之近  
世試帖多效法焉蓉峰聶前輩輯干支便覽一  
書行世已久然隨手抄撮間有未盡善處暇日  
刪其複沓覈其脫譌按類分編錄爲一帙復取  
其存而未對對而未工者補成一帙統名類編  
非掠美亦非欲抗衡也藏之巾箱以備不時之  
需云爾時嘉慶丁丑冬中澣謝棠主人自記於  
茶半香初之室



沈毓蓀序干支類編一書長白福禹門先生所輯也創之者衡山聶太史徵引極博津逮後學不淺然才人多疏不免有複脫漏處是編增刪盡善真藝林寶筏也但姬公作周官王介甫借以禍天下老子道經流爲申商凡事類然文章尤甚近日試帖往往不貼題硬嵌干支自謂憂憂生新閱者早望而生厭讀是編能善會先生之意則庶幾矣

梅花氏琴譜二卷

噶福辰撰

謹案噶福辰字學山府學生員

筆耕集六卷

常清撰

乍浦備志常清滿洲正白旗人官乍浦營佐領  
瀟灑自如喜爲詩奇氣橫溢非侏儒所能望其  
後塵也

聽雨軒集二卷

雙成撰

歸田草一卷

雙成撰

緝雅堂詩話杭州自順治五年創立駐防以來其將帥類皆敦詩說禮故著籍者代有達人近年若瑞文端之相業浙人士至引以爲重若宣勞疆場則就園之壬寅防海乍浦甲寅之奏捷西甯戰功尤著然且治軍之暇手不釋卷逮於引年林倦壓裝惟有圖書古昔儒將風流仿佛遇是可慕也

謹案雙成字就園滿洲正藍旗人由府學生於嘉慶壬戌考取繙繹筆帖式未補挑驍騎校道光己酉歷升協領戊戌壬戌屢於海防

著戰功丙午授西安副都統後署西甯將軍  
咸豐甲寅勦匪東平奏捷於馮官屯僧忠親  
王列入薦剡

賞戴花翎又佐忠親王進勦連鎮埽靖逆氛後以  
年老乞休奉

旨賞食全俸

瀚海雪山游覽記八卷

佛龍武撰

謹案佛龍武字純齋滿洲正白旗人乾隆間  
任本旗協領後陞廣平參將旋調喜峯口奉

差巡哨游牧各卡倫若瀚海雪山蒙古烏梁  
海札薩克諸部落足跡所至筆之於書

自怡齋集鈔二卷

玉麟撰 原名常松保

乍浦備志鶴軒以筆帖式陞至左營左翼協領  
博文嗜古能承家學

謹案玉麟爲副都統善泰孫考取筆帖式歷  
遷鑲黃旗驍騎校鑲紅旗防禦坐陞佐領嘉  
慶中入覲京師繕錄其祖草竹軒三種及所  
撰此集進呈蒙

賜翰林及第仍以佐領回駐防原旗供職

語華軒詩集

觀成撰

鑄廬吟草二卷 亦是吾廬詩一卷蕉竹山房詩一

卷

裕貴撰

貴成寄裕乙垣詩遙憶鑄廬

原注寓額

中真成遜世

翁冷官羈十載蕭寺占三弓

原注寓法華寺內

篋有新

詩富身還舊日窮閒情事花草日日醉春風已

覺嵇康懶還多點也狂塵談迫兩晉詩律重三

唐衣爲留賓典齋偏近佛忘宵深猶把卷底叉  
業岐黃

擬槐書屋三卷

常書堃撰

謹案常書堃字繡與府學生員

三畏堂繙譯校士錄八卷

勒爾經阿撰

謹案勒爾經阿字朗亭滿洲鑲藍旗人由左

翼筆帖式厯遷鑲紅旗驍騎校鑲白旗防禦

正黃旗佐領右營左翼協領掌右司關防記

名以副都統用兼左右營滿蒙八旗繙譯掌教

樹廬詩草一卷

文瑞撰

貴成題冠梅樹廬詩草後詩獨樹騷壇幟殷勤  
好句搜豈徒鳴一世直欲壓千秋之子才無敵  
雄心惜未酬傷今兼弔古讀罷感清流

自芳齋吟草三卷

善能撰

輜軒續錄盛元曰兩入氏烏爾達同治間由京



乞假還旗倡建梅青書院與子相助爲理教育  
八旗子弟妻馮氏未偕赴京都仍居杭營因殉  
辛酉之難

深柳讀書堂詩集四卷

明忠撰

謹案明忠字石窗號半翁滿洲 旗人府

學庠生工畫

湖山補遺錄二卷

廷玉撰

城西古蹟考八卷

廷玉撰

文秀序杭州滿營當會城之西隅其閒寺觀祠  
宇以及橋梁碑墓今昔稱謂差自異同而改之  
所正復不少前修浙江統志暨西湖志者雖總  
彙精詳而滿營之攷證闕如也如涇岩先生爲  
杭州滿營駐防名諸生氏巴爾達名廷玉受知  
於潘文正公平生好古嗜書兼工繪事得其片  
羽者什襲藏之所閱書不下千萬卷西湖之佳  
山水登涉殆徧老友如明石窗雙就園諸先達  
咸欽其品學焉游山詩富卷帙者半所著有湖

山補遺錄若干卷今所擬梓者城西古蹟攷係先生五十餘年之心力結撰而成者也前列圖說并詳以古今稱謂之不同而總以不失傳者爲是凡寺觀祠宇以及橋梁碑墓無所不載其中漢唐以迄元明人物事蹟班班可據誠足補省志府志縣志所未備也我滿營二百餘年來惜未有傳志卽有家乘遺編大率隨意拋棄故流傳者尠先生有心名教凡一事實一掌故無不系於心而筆於書秀雖有志於古而囿於才艱於力未能贊先生之盛舉今讀是編不啻遇

天寶宮人重談軼事矣後日有本此爲綱而作  
滿營之志者胥先生繼述之力之所在然先生  
是書不獨可以繼往而并可以開來其所係豈  
不重哉先生年七十又七矣龐眉古貌令人肅  
然起敬猶眼明足健手不停披倘天與遺老錫  
以遐齡將繼是編而傳者正不止此秀不才後  
進何敢步先生之後塵第前輩典型久焉心佩  
欲效何仲言之於范零陵也先生其許之乎因  
不揣謏陋而僭爲之序時在咸豐五年歲次乙  
卯秋八月瀋陽後學文秀吟香氏撰

雙成序讀魯論至隱居求志一節不禁三嘆古今來世豈絕人如義不能行道不能達則養愚守拙終身衡泌而已如涇岩翁者與余幼同塾長同事深知其品與學至不惑年斷棘闌路誠爲知命者也其於書益不廢焉道光丙午余調鎮長安南北判袂從關山遠隔戎馬奔馳每望渭樹懷及江雲嗣因年邁乞休不意歸里會時則把酒評詩得以共談心曲乃出所述滿營中列朝之遺踪古蹟彙集成書展讀之下凡忠孝節義武烈文華並致君澤民維風端化者代有

其人晦者復顯闕者復補可勸可懲厯厯足考  
卽隱遁知機流廟樂志大才小技無不備紀至  
於老氏虛無釋家空幻而奇聞異事續陸勳之  
幽怪干寶之搜神也是豈僅以祠宇府第創建  
興衰河梁井里開濬修治以傳其始末哉旣求  
志而負志不行不達則引古證今寄託於毫端  
楮尾耳就園叟謹序於翰衛餘暇處

日序予童年好聞父老談古典而不知何謂古  
也後入塾讀書始知凡厯千百年之事迹謂之  
古也意以城西一帶旣駐爲營其中豈無古蹟

如有之其必晰載羣書尋繹堪考故益窮究簡  
篇而探賸索隱遠紹旁搜隨所見聞綜而紀之  
矣弱冠嫻習武備及暇於書不輟嘉慶庚午有  
故友雪香許敬言石橋施紹武尋覓營中古蹟  
擬彙一書傳因雪香久寓於茲意相討論耳乃  
荅云吾友已詢訪迨徧考載未備久成數帙只  
虧一篲之功問者於是止焉道光間蔡木龕與  
鎖吟竹知予是集諄諄寄言可訂成書足傳列  
朝之文獻掌故予以遺逸殊多恐有所漏且姑  
待證之吳康甫嘗日月逝矣歲不我與而徐問

遽吳秋哇猶勸勸付梓子以未盡善也咸豐癸  
丑鏡泉羅君偕汪劍秋聞知相訪下顧寒廬其  
相談古事迹娓娓不倦予未敢出眎其藁繼而  
納庵上人同鐵樵汪君亦爲下顧子揣管窺蠡  
測何敢質諸大雅才家如不以此藁爲虛誕埃  
藁成時請以就正補遺則五十餘年求益之懷  
可適營圖自繪四界瞭然按圖可考足以闡揚  
前賢之勳勩文章並近代名流碩望其芳軌奇  
踪處處堪尋乙卯秋鏡泉假予所繪之圖相攜  
週覽憑弔於城西西北一帶慨歎於夕陽芳草



閒其蕊宮梵院名賢流寓之所或頽垣敗址猶能指視則此日之消殘不勝興感也越日鐵樵復假所述未竣之初藁攜歸錄一副墨謂俾廣見聞何諸君嗜好相同如斯之極此皆子竊取於羣書并斷簡殘編而已今旣彙集訂以成書雖再厯千百年之後其古典事迹豈復湮沒則予一生好古之心於斯知可畢焉矣咸豐八年歲次戊午小春蘊之廷玉

自跋曰古今一轍也日月如轉輪俯今卽古古由今也是集所述收輯先朝之遺事而與近代

之人文可誌者附載篇章或謂子誤矣既謂古蹟何須濫列時人予曰非也茲所載見聞及者堪以媲美前徽足徵後世如昔人之事迹不紀於書則久之無傳故竝述之耳遙遙文武猶望輶軒聊備采風者之去取焉石湖翁跋

蒼雪齋詩稿

廷玉撰

臥月堂稿二卷

兆熊撰

柳洲子集一卷

杭州八旗卷二十一

兆熊撰

柳洲子詞一卷

兆熊撰

謹案兆熊字渭飛

旗人府學生員

居丁家橋嘗刳股以療母病

拾花館小草二卷

祿慶撰

貴成贈祿縵亭詩吾友縵亭世寡傳丰神灑落  
學業優年未三十俗慮休覩破富貴浮雲浮欣  
然從事惟糟邱放歌不肯隨庸流山上臺榭湖

上舟往往折柬招同游論交惟我情最投三日  
不見成隱憂一見耿耿明雙眸典衣沾酒先我  
留擎杯大笑詩興適搖筆氣欲橫斗牛有時寂  
坐肆冥搜如蟻穿珠屎燭幽有時高歌臨滄洲  
斷鴻驚落霜天秋惜哉磊落胸未酬元龍豪氣  
空九州卽今自命醉鄉侯酒杯在手心悠悠除  
卻吟詩百不求

西甯秉節錄六卷

謚恭介東純撰

謹案恭介字紫來滿洲正藍旗人道光十六

年授正藍旗協領兼鑲藍旗協領二十四年  
授福州副都統歷署將軍咸豐四年以副都  
統充西甯辦事大臣七年擢福州將軍九年  
調成都將軍取道返浙值初次被寇欲傾囊  
儲軍將軍瑞昌議奏留浙辦軍務未果遂赴  
任行至湖北卒於途次

賜祭葬予諡

吟香集四卷

文秀撰

亦芳草堂詩集八卷

文秀撰

戴熙題文清士秀詩稿詩閱徧通材筆君思氣  
最真偶然拈妙諦渾不著纖塵古調憑誰賞穠  
華未遇春天心知有待先遣作傳人

白華吟稿八卷

赫特赫訥撰

謹案是稿爲文秀所輯錄者

如丹吟館詩鈔

謚文端瑞常撰

夏同善序詩本性情而詩人多以山水爲性情

吾杭山水據東南之勝靈秀之氣尤萃於西子  
一湖古時宦遊於此往往句留不能去白公蘇  
公其尤著者也矧性耽風雅生長其地者哉芝  
生相國蒙古人其先世駐防於杭故又爲杭人  
光緒戊寅春公子葵卿通副以公遺集如舟吟  
館詩鈔一編問序於余署曰長西湖芝生氏  
著余受而讀之喟然曰公眞性情中人也古所  
稱樂操土風不忘舊者也公自詞林游登宰輔  
其事業在

國史其生平行誼在天下人之口固不藉詩以傳

是集分年編次一生出處遊蹤宦蹟厯厯可指  
亦不藉西湖以傳然其中思親憶弟及朋僚贈  
答之作低徊往復未嘗不時動鄉關之思此以  
知眞山水眞性情固有凝結於不可解者千秋  
萬歲公之魂魄必猶依戀此湖也夫溫柔敦厚  
詩教也四牡采薇諸篇一則曰豈不懷歸再則  
曰豈不懷歸古人王事賢勞而眷懷父母之邦  
有根於性發於情而不能自己者公以身依禁  
近匪躬蹇蹇不克優游於六橋三竺閒於是顧  
瞻桑梓形之詠歌一往情深若此嗚呼何其纏



綿悱惻如與古詩人相語於一堂也余自丙辰  
來京師泊公之薨承色笑而聆緒論者十有餘  
年竊見公之厚於吾杭人與吾杭人之敬公愛  
公也今讀遺編益歎其所由來者非偶然矣昔  
昌黎謂楊景山爲古之鄉先生歿而可祭於社  
者余於公亦云然故因葵卿通副之請而言其  
詩之所本者如此至其詩之清新俊逸妙集眾  
長足以繼蘇白二公之後而爲湖山生色也讀  
者咸能道故不具論云鄉後學夏同善拜撰

樂琴書室詩稿四卷

瑞慶撰

閩游草

富樂賀撰

謹案富樂賀字桐軒東恭介公子滿洲正藍  
旗人官福建福甯府知府

靈石山房詩草

貴成撰

龔自閔序鏡泉與余同舉於鄉卽知爲吾杭詩  
人而全集未之見也嗣同官京朝先後閱二十  
餘年春秋佳日尊酒追陪縱言往事具古人風

臭味益親訂交日深茲以所著靈石山房詩集  
見示屬序讀既竟因歎詩以道性情良不誣也  
集內憂時感事之作悉由忠愛鬱結之忱發諸  
吟詠寄託遙深而無訐激操切之詞神味雋永  
淵然以長不失風人敦厚溫柔之旨至觸景言  
情據寫胸臆以及弔古述懷諸篇則氣魄雄渾  
顧視清高洵不媿爲近代詩家也自維譾陋不  
足以序君詩然每讀至湖山歎詠名勝留題之  
作回首家山不禁鄉思怛怛竊念與君爲忘形  
交知君素儲偉抱乃委心任運不與世俗浮沈

閔不才更無所建立以副

聖明異日同賦遂初一觴一詠得追隨於兩峯三竺  
間後之視今以序爲左券君其許爲同志乎不  
敢以不文辭爰三復以歸之同治戊辰夏六月  
年愚弟龔自閔序於春明寓廬之盟鷗舫

黃雲鵠序鏡泉齋年與予同官共部十餘歲以  
文行相敦尙相得無閒君旣習公家事又務持  
正吾兩人議多同或不合則相與變色吏胥環  
顧失色然兩人相得乃益甚以故公卿交友閒  
晤予必詢君近事晤君亦如之會去職方監督

太倉予亦由駕曹出守雅州兩人把晤各不勝情蓋非獨傷離惜別已也君以予遠去出所爲詩草命校行色匆匆不復能細加評騭讀述懷弔古感時言事諸作但覺一往情深惟閒賦五章剔幽燭怪頗覺傷激要不失小雅風刺之旨嗟乎鏡泉我與若往事皆不足道自茲以後惟各務其所不容己者或更數年得復聚首出別後詩若文相質如能湔除宿臆自吟風弄月範冰模山之外無一語及他則吾與若進矣能然與否未敢自知姑存此言俟諸異日同治七年

季秋蘄州黃雲鶴序

李江跋吾友貴子鏡泉梓其所爲詩凡若干首以示江江讀而歎曰君非第以詩名者也往與君共事職方見君於公家職事能搜抉其利弊有所不可議論侃侃百折不回其當官無援於人而不爲勢屈與人交重然諾不苟取與然寡所諸偶落落不與流俗合蓋古所謂彊直清介之士也以君之才之守當爲世用今第以詩名非君之遇之窮乎顧君雖遭困折而持乃益堅識乃益定所爲詩乃益峭厲嶙峋有不可逼視

之概君固無窮之見存也然君之詩益進江益  
於君之窮信之漁陽李江跋

南康府志二十四卷

盛元撰

自序南康以山水名天下自晉以還爲仙真隱  
逸之所窟宅至宋濂溪考亭兩先生出而道學  
遂盛於東南其他節義文章尤指不勝屈慕其  
風者往往舟車跋涉閒關千里訪古尋幽盤桓  
數日不忍去而仕宦轉視爲畏途蓋山田犂确  
水田大半苦潦土產稀微民不知懋遷之利而

地當孔道東粵使輅則往來絡繹頻年兵燹公私赤立近雖稍謀綴葺而百孔千瘡守土者不能不爲束手予以庚午歲承乏此邦適值中丞劉公廣開志局下其條例於郡縣俾續修者知所遵守夫南康自廖公文英作志後距今二百餘年矣

國家深仁厚澤蠲租給振疊沛鴻施以至職官之遷除武備之申儆人材之輩出其自粵匪肆虐後毀家紓難殉節捐軀者尤不可以無紀第通籍以來一行作吏筆墨久疏方期考其山川按



其圖記與士大夫往復而商訂之而釀金絕少薪油莫給因念三十年干役章門吏治民風猶諸崖略又叨司守禦飛書馳檄聞見較真不揣固陋謹取各縣志舉要刪繁閒有彼此抵牾之處務令條分縷合以昭畫一前志有未核者亦閒以鄙意附見其閒手自編摩周一寒暑而始告竣期於無聚訟無偏枯無支且漏而未可以必得也脫稿後徧質諸寅好士紳始勉出授梓且略識其本末於簡端云同治十有一年歲次壬申嘉平月知南康府事長白盛元序

又凡例略云南康郡志創於宋至明凡三修泊乎

國朝康熙十三年廖前守文英重加修葺體例一仍旧志而不載舊序茲由旧志摘出登載以免散佚若宋時之序已不可復覩矣康熙甲辰距今二百餘年中遇咸豐三年兵燹檔案燬失碑記存者十纔一二省局抄發職名僅有乾隆八年以後知府姓名出身茲就現存碑記及見於山志洞志者登載鼎彝鐘鑪兵燹後莫有存者訪之縉流羽客概未之見所不乏者崖間之刻

耳中惟秀峯尤夥然宋人留題多在鹿洞附近  
於此見古人無在非見道之地非賞玩風景已  
也

營防小誌

盛元撰

謹案署名稱鉞花館主人述於營制條分縷  
析極爲詳備

怡園詩草

盛元撰

輶軒續錄丁丙曰愷庭以卽用知縣之江西補

餘干令未幾丁憂服闋捐升知府補南康以道  
員銓選告歸後卜築洪福橋東竹木深秀富藏  
卷軸與吳筠軒觀察同年又曾同官江西最稱  
莫逆相與結鐵華吟社予亦忝附唱和極一時  
之盛

固廬詩存三卷

固嚕鏗撰

輅軒續錄王廷鼎曰畫臣爲傑果毅公季子辛  
西城陷果毅公戰歿畫臣突圍出入都呈明全  
家死事狀

賜襲騎都尉世職事平回旗補府學生員筮仕廣西

授潯州知府

桐雅軒琴譜二卷隨筆二卷

文元撰

謹案文元字濟川鑲藍旗協領掌理右司關  
防本駐防乍浦道光壬寅之變方七齡卽能  
以智自脫少好讀書格於例不得試遂專肄  
清文咸豐庚申檄調守杭屢獻策不果用辛  
酉城陷轉戰受重傷迺遁

諭旨往依江甯將軍標下難後歸併杭州駐防兩

屈軍政保薦卓異記名以副都統用生平尤  
精音律公暇恒彈琴詠詩以自娛云

附

冬青館集

女史王韶撰

謹案女史爲錢塘王司馬棣女原任福甯府

知府富樂賀室工畫

超範室畫範

女史瓜爾佳氏畫梁撰

謹案女史爲筆帖式五品軍功鳳瑞女現承

襲騎都尉兼雲騎尉仁興室己丑 恩科舉  
人乃賡母

杭州八旗駐防營志略卷二十二

仁和張大昌輯

寺院志勝

梅青院關帝廟 在延齡門大街門對延齡橋

左右有鐘鼓樓兩廂爲朝房爲大殿春秋祭丁  
及五月十三日均齋戒三日陳太牢及牲將軍  
副都統率同協領以下各官及眾兵弁讀祝行  
三獻九叩禮焚香帛畢理事同知廳分送祭神  
胙肉每月朔望將軍率同各官詣廟行香一切  
禮節恭遵會典殿後爲佛樓觀音殿又後爲友



竹交松軒僧印海募建印海善琴將軍富椿曾  
薦主天竺法喜寺講席徒融川嗣之

城西古蹟考咸

豐辛酉燬於兵同治中官兵公同建復正殿佛  
閣廟門外爲演劇臺規模較昔尤宏敞析右側

爲書院

營防志

噶福辰友竹交松軒額跋

古刹梅青孤山遺跡湖山之光風以主營

中之香火梵宮巍義以壯觀殿後一軒頗甚幽雅友於松竹也寶宜耳爰額之

土地廟

又稱林相公廟

在梅青院之右鼓樓側內塑

和靖先生像併一鶴廟門塑神將二貌猙獰可

畏崇祀爲土穀社神相傳此未隱時所居之故

址城西古蹟考

瑞靄斗壇 在土地廟設自康熙初蓋營中間散耆老建以祝釐誦經禮斗嘉慶初川楚教匪滋事奉禁遂止壇有密鼎三所畫神像三十六軸後爲金泰元所藏城西古蹟考

眞靜庵 在畚箕兜鑲白旗協領署西城西古蹟考

興建眞靜庵碑記滿營眞靜庵初自大清康熙六年間也茲因眞靜庵師尼乃女中之丈夫僧中之龍象師號慧光名智澄係滿洲正紅旗人氏因夫主出征酋寇身烈陣亡澄省悟無常苦空無我之幻勢不久停朝夕忖思修出世法以報夫恩就於滿營洗布園內覓地棲身賴其族叔王世英王世傑捐資建業買得馬姓墓地長短闊隘共三十四丈一尺四

至分明建造殿宇名曰真靜庵子身立願不募  
檀門苦志焚修有徒恆修遵師苦行依教修僅  
至今四十餘年第恆念自身老邁力已衰殯僅  
得徒眾等智等攝承為庵中之主頂立香火朝  
暮焚修以報  
國皇水土之恩父母之德猶恐日久月深不信  
三寶之士將此庵基拆毀地界傾占特勒石四  
至開明東至李府牆南至大街西至張府牆北  
至張家園告報十方貴官達士以至本營植護  
念恆四十餘年之苦心非一日之程伏乞檀護  
視為佛法之金湯衛護本庵香火咸令僧眾安  
逸朝暮焚修報答四恩福有攸歸恩垂不朽矣  
助庵基主王諱世英世傑本庵護法鎮將軍  
馬諱哈達鑲白旗固山大圖諱爾又鑲白旗固  
山大花諱禪布正紅旗甲賴章京張諱端木庵  
施主鑲白旗額魯諱格德賢各旗十方檀那康  
熙癸巳年孟秋庵  
主王佐王任建立

妙心寺

在焦雞巷

城西古蹟考

舊在西湖行春橋

南元至正間建未久燬移建今處

成化杭州府志

旌德觀

在延齡門大街左對西小街內相傳

此爲舊旌德觀因築營遷福地巷之北舊名先賢祠宋寶慶二年京尹袁韶建於蘇隄以祀鄉名士列女共三十九人次年詔易其額曰旌德中書王堅爲之記元時改建於此明初燬成化十三年道士許道昌等重建今所祀乃溫元帥僅樓櫓而已

城西古蹟考

長春庵

在相安巷元至治初女冠蔡景春建

後爲全真所宅歸正一法

成化杭州府志

永樂間袁守

常來往爲都成化七年沈繼昇爲都紀振演庵

益宏善守則沈如松焉

吳璜重修長春庵記

長生庵 延祐間有姚真人者錢塘人妻蔡氏

於相安巷建庵曰長春姚亦建庵妙心寺北曰

長生夫妻皆證道妙人稱雙修

西湖游覽志

今在溜

水橋西城下後爲昭慶下院萬厯間僧智禮募

建掩關六載裝塑千佛羅漢

武林梵志

天啟二年僧

悟庠通毓湛仁重修

孫昌裔古長生庵碑

乾隆四十一年

協領爾圖重修

城西古蹟考

爾圖重修長生千佛寺碑記

古長生千佛寺者相傳建於五代時

宋元以來香火罔替明天啟中殿稍圯坊民與住持僧募緣修葺督學使者孫公昌裔立碑記其事迨我

國家定鼎

命禁旅三千人鎮守兩浙以西壁坊為營地故寺隸滿洲鑲白旗所轄迄今距重修時已百有六十餘年歲月絳歷風雨漂搖龍象有傾壓之懼緇素遊晨夕之儲其曲房小圃而為本旗子弟讀書角射之所者亦皆傾頽就廢靡可憩息余自乾隆三十有六年來宦斯土下車伊始瞻拜徘徊謀欲新之以時細舉羸力未遑也至四十一乃率先捐貲修建適郡守衛公楊公邵公先後來莅欣然各出百金其襄勝果並集同人之樂善者咸出櫝施凡修建大殿後殿山門西廡以豐丈室齋廚莫不畢具丹堊一新計費白金五百餘兩并規畫僧眾館粥之需為久遠計從此慈蔭慧日長晡凡我旗人將於是祝聖報功於政事實有神益豈僅美觀瞻求福利已哉爰撫其實而書之並勒喜捨芳名於左額祈鑲白旗協領署鑲黃正藍旗佐領額爾圖撰并書

杭州八旗

卷二十二

台州府知府署杭州府知府衛誥湖州府知府  
署杭州府知府楊成龍杭州府知府邵齊然紳  
士吳汾佐領元泰元保辰福防禦喜林小雷驍  
騎校阿龍武德祿貴格永福前鋒校領催前鋒  
兵等立乾隆四十二年二月

水德寺 在畚箕兜五代時錢氏所創城西古蹟考

西城嶽闕天齊廟 在湧金水門北順治間卽

水德寺址拓大之改建城西古蹟考

上方寺 在溜水橋北通西井官道肇建梁貞

明七年城西古蹟考南宋爲尼院稱西竺庵慶元五

年移請今額咸清縣志明景泰四年僧散寺廢漸

爲民居嘉靖二十三年尙寶卿徐六橋佃爲圃

蓮池大師記萬曆十六年徐懋功王承憲等議捨放生池

爲佛殿二十一年王廷棟二十三年宋守一續

捨之於是金世徐馬汝孝王榜李陞李世顯之

屋宋皆購之入寺交蓮池以爲雲棲下院雲棲事紀

向明正位別爲迴廊旋所向面城而門池以放

生以隙地之屋葺其蔕楹守以衲子放生池記側爲

魚塚掩所放之自斃者城西古蹟考咸豐辛酉燬同

治以廢地與千佛閣址均闌入將軍署焉防營志

西井寺在東西壁里宋淳熙十一年僧道顯

建移鳳凰山安國羅漢爲額順治壬辰燬於火



漢軍佐領唐國政倡復之康熙和縣志寺供闕帝營防

志小

唐國政重建西井寺記杭郡古困斥鹵以其瀕  
引湖水人民乃得飲甘和及吳越錢王築捍江  
塘而海水無灌城之虞六井遂漸廢金牛之湮  
益以南井其址猶可得其五其相國井之名由  
相國寺得也相國寺本與嘉澤廟皆祀李鄴侯  
鄴侯唐相國也故於第一井曰相國井而成化  
志云安國羅漢寺即相國寺西井俗呼西井寺  
則六井中將謂相國井即西井傳之後世併為  
一談不且以所存五井又失其一井思詳審之  
成化志由咸淳志誤讀之遂作影響之談曾不  
相國西井之文而誤讀之遂作影響之談曾不  
知咸淳志所云相國西井猶云鄴侯西井否則  
何以不徑云相國乎然則相國寺與西井寺顯  
然非一本非俗呼寺燬而不復之安知他日不  
且湮西井之名乎況寺中奉武帝側則設發備

冷寺綦重也爰約同志創復重建非藉祈福存古蹟耳既落成爰書數語以爲記覽者毋哂余之不諳於文而妄言唐國政

記順治九年八月穀旦立石

嘉澤廟 在湧金門西城下神李泌字長源唐

相國鄴侯也景定六年敕以嘉澤爲額咸淳六

年拓地重建

咸淳臨安志

相國寺 在甘泉坊

嘉靖仁和县志

明慶寺 在木子巷北唐大中二年僧景初建

爲靈隱院大中祥符五年改今額宋景定三年

建宸奎萬壽之閣咸淳三年建聖佛殿淳祐七

年建法喜堂明碧軒

咸淳臨安志

元至元癸巳大德

癸卯再燬再復至正辛巳落厄於灾杲律師圖

興復建大殿位置稍西丞相朵爾只展慶贊儀

黃潛明寺有吳越白傘蓋陀羅尼幢容齋四筆宋蘇

文忠書觀音經碑及題識大智禪師書彌陀字

碑

嘉靖仁  
和縣志

千頃廣化院 在木子巷北開平元年吳越王

錢氏建舊名千頃大中祥符九年改今額南渡

後爲臨安祝聖道場所慶元六年僧善彬建張

眞君行祠六觀堂

咸淳臨安志

有慈光大師了性塔

嘉靖仁  
和縣志

元至治癸亥僧善住寓於院

谷響集

圓通閣 在院側慶元中僧善彬建彬五鼓初

懺禮道場忽現大琉璃放百寶光數刻不散周

芝圓通閣內有李鄴侯祠營防

龍翔宮 在南北壁里舊在後市街宋理宗潛

邸淳祐四年賜額龍翔別築南鎮館於宮西以

居道流元至元壬午燬道士胡元洪改建今所

乾隆杭宮初爲三齋延祐中住持黃石翁增爲

十曰履和曰頤正曰全真曰宜休曰觀妙曰東

明日環隱曰守正曰安晚元統癸酉燬住持史

景仁更作之徐一夔重修張士誠改爲軍器局

龍翔宮記

洪武初道士毛繼祖復其舊

乾隆杭  
州府志

宮後有小

蓬山荷花池池中疊石爲山立一亭由山石以

登額曰魚樂軒

城西古蹟考

顯忠廟

在長生橋俗名霍使君廟紹興間建

初吳主孫皓疾有神降於庭自言爲漢霍光求

立祠於金山之鹹塘以捍水患見吳越王所紀

宣和賜今額紹興初加封忠烈順濟昭應王

咸

臨安志

嘉泰紹定間兩有反風滅火之應元元統

初六月甲申火神風遽轉廟暨左右民居錢塘

學賴以存道士人王眉君遂昌縣達魯花赤阿

賴帖太捐粟施金彩色神像

葉森顯忠廟碑

嘉慶間殘

碑砌牆內字不能讀廟中尙存康熙間所立者

數碑

城西占蹟考

清修院

在錢塘門內天竺街

城西占蹟考

靈衛廟

亦稱金祝廟又稱雙龍庵

宋金勝祝威爲錢塘尉

曹總目建炎己酉金人侵杭錢塘令朱蹕鳩鄉

兵趨餘杭邀擊陷陣歿金祝二公集殘兵據葛

嶺以禦復力護西隅力戰遇害鄉人立祠死所

并祀朱公

鄭子靈衛廟碑

在小營門之旁

城西占蹟考

小關帝廟

在潘閭巷西

防營小志

宋三將軍廟

亦稱三忠祠又稱旌忠祠

在頗家街其神爲

高永能景思諲程博宋元豐間統軍銀川戰死

廟食於和尙原南渡後建

城西古蹟考

開元宮

舊在泰和坊內宋甯宗潛邸嘉泰元

年建元至正二十八年燬改建在清湖橋之西

翰林學士虞集撰碑至治初民火延燎住持王

壽徵改作之陳旅撰記揭文安撰碑有清風軒

介春堂胎仙閣

威化杭州府志

地本宋周漢國公主府

元句曲外史張伯雨入道於此外史開元宮得

月軒詞有環堵隘花狼藉溝水漲雲充斥似石

魚湖小酒船寬窄之句雍正癸卯僅矮屋數楹

奉高真像旁有隙地積水縱橫猶是當年陳跡

樊榭山房集

嘉慶辛酉改建山門於新開街小橋之

西城西古蹟考

闕伯宣明王廟

在開元宮正殿之右

清尊集汪遠孫

開元宮詩注

元壇神祠

在開元宮門東至治九年十月火

起宮西民舍住持王壽衍亟救不克黎明見神

屹立門外神虎在河濱灰燼中木主帛旛皆不

壞遂新祠奉神與虎復焉

陳族元壇祠碑



菩提講寺

舊稱菩提院

舊在錢塘門外太平興國

二年錢惟演捨宅建七年賜額建炎閒燬紹興

中又建淳祐六年建千佛閣舊有堂二曰南漪

迎薰東坡有南漪堂看杜鵑花詩勒於石元末

燬後築城寺基而徙寺於宋太學街東明洪武

初重建

成化杭州府志

洪武二十三年省入

慶寺三

十一年勅聽復舊僧能爲堂三楹及寮舍

胡粹

中重建菩提律寺記

乾隆閒僧楚峯蓮芳住東房其西房

與海月房已絕嘉慶初將軍普福重修道光已

酉蒙古八旗協領伍爾滾募鑄鐵鼎鑪置殿前

城西古蹟考

瑞文端贈文吟香讀書菩提院詩讀書已殫十年功誰識良

材爨下桐春草不除生意滿小窗低映夜燈紅禪房習靜遠塵囂詩社聯吟逸興豪莫訝鵬程

千萬里但搏健翻自凌霄

臨水夫人廟 在清河橋北同治間建防營志

大財神堂 在潘閭巷北城西古蹟考

大悲庵 在南糧倉後防營志奉道德真君及神

洲元君古柏蒼鬱艱子嗣者於此求子以四月

十八日為神誕城西古蹟考光緒初正黃旗防禦德

緒重建防營志

蕭鄧侯廟 在睦親坊新慶巷祠肇南宋歲久

圯廢元正德乙亥刑部主事張禴長沙貳守董

璠耆民焦富等長春庵都紀陳宗輔徒湯良佐

居守儒修舉之明嘉靖乙未燬道士蔡如璋重

建徐江山重建  
蕭王廟碑記

仲子祠 舊在弼教坊康熙二十六年巡撫金

鉉移建於湧金門外與端木子合祀城西古蹟考

棚心寺 在定民坊中棚巷城西古蹟考百福院舊

名資壽乾道三年徙城中棚心有古井咸清臨安志

後因以爲額城西古蹟考

五顯關帝廟 在五顯廟直街舊祀五路財神

額稱五顯立營後改祀關帝

城西古蹟考

小廟 殿前古柏森翠在沿城之第三直街左

首衙內

城西古蹟考

護忠庵 在義方巷祀宋殿前校尉施全相傳

秦檜磔施校尉爲百八段杭人祀爲百八處土

穀神此則爲頂骨處庵前一井乾隆五十年大

旱浚之得鐵簫一枝音猶嘹亮云

城西古蹟考

慈濟庵 在神堂巷元至正甲午牧牛孝公建

元末燬明洪武間僧宗愷重建

城西古蹟考

寶覺寺 在八仙茶坊吳越錢王建明萬厯間

重修乾隆初邢邦玉密晉三僧蓮芳募建嘉慶

初折毀佛閣

城西古蹟考

東嶽天齊廟 在八仙茶坊順治初以寶覺寺

殿宇析爲廟嘉慶初重修有碑立殿前

城西古蹟考

關帝廟

在石湖橋

防營小志

財神堂 在石湖橋堂以甌鏤刻極精巧有吳

省蘭書福齊康裕四字額

城西古蹟考

馬塍廟 在軍將橋東塊臨河數椽頗雅潔嘉

慶初圯址爲營房

城西古蹟考

輓鼓院關帝廟 在輓鼓橋西堍嘉慶中吐魯  
番辦事大臣佛智建

佛智重建廟記 我

勅封朝定鼎百靈效順而關帝聖蹟感應尤多是以  
神勇追封三代載於祀典京旗分署雖極微之

發爾哈亦罔弗壘碑爲堂供奉神像於署浙之  
會垣設八旗駐防營官員以至兵卒咸虔奉香  
火惟神降鑒庶佑靈著輓鼓橋東堍向有廟址  
其狹隘蓋營中士卒所建者以紂於茲故不能  
宏敞襲者余遇差清曉憩於橋畔倦而坐石倚  
闌入睡鄉夢中恍惚神促之曰起起猝驚覺幸  
不誤公差按獲獎詣座前叩謝且禱籲賜佑將  
來嗣是二十年中承

恩命

擢成都副都統統轄漢土官軍控制苗蠻仰荷  
威靈從公得展撫御之方皆神默相佑護故中  
外之禔福也若是銜感盛德函屬家人拓地重  
建以答神庥撥寄廉俸爲工匠資時適奉

杭州

八旗

卷二十二

主

命辦事上魯番南望湖山睽隔萬里今幸得保首領

乞骸骨歸舊旗伍甸階下躬自酌酒漿再拜

叩首畢周視殿廡廊榭庀材尚堅爰泚筆記之

以自抒其區區之誠焉而已

立同觀 在八字橋西南癸辛街元至正癸巳

道錄郎如山建大德辛丑賜額成化杭州府志有壺中

林壑諸勝北斗殿壁李息齋畫松二株客杭前

為楊氏瞰碧園後燬明宣德乙卯重建嘉靖仁和縣志

智勝院 在仁和北壁唐天福二年錢氏建舊

名眾安宋治平二年改是額南渡後近秀王邸

遷寺於丁家橋元初居民延燎遷於相安巷成化

杭州府志

洪福橋關帝廟 在橋上舊供佛駐營時遷佛

於旁供關帝後跨河爲觀音閣乾隆間燬於火

嘉慶初重建

城西古蹟考

喇嘛寺 在八寶街康熙四十八年喇嘛明住

嚙卜楚發往杭州看守

東華錄

居此因稱喇嘛寺

城西古蹟考

鶴林宮 在俞家園宋慶元乙卯旱順濟觀道

士劉友真禱雨紹定辛卯卽所寓舍爲觀請今

額

咸清臨安志



魁星閣

在紀家橋

營防小志

華嚴寺

在紀家橋宋南渡徙錢塘縣署於其

址

浙江通志

天妃宮

在草芝巷口直街乾隆五十二年營

兵出征臺灣凱旋渡海遇颶風蒙神而安歸營

捐建嘉慶十三年重修其神壁左右明忠畫鬼

物極猙獰

城西古蹟考

倉王廟

在南糧倉內

欽定古今圖書集成

金華將軍行宮

在梅青院左首咸豐十年建

後改爲將軍瑞忠壯公祠

營防小志

附

乍浦關帝廟 一在右營鑲白旗乾隆三十九

年建一在右營正紅旗一在左營鑲黃旗俱乾

隆五十八年建

乍浦備志

安甯寺 在左營正黃旗乾隆五十七年建供

奉關帝並火神馬王

乍浦備志

土地廟 在湯山軍王殿內

陳山顯濟龍王廟 在陳山宋大觀三年建祀

白龍君崇甯三年詔以顯濟名廟政和閒封爵

宣和五年封淵靈侯紹熙元年進封廣惠龍母

爲慶善夫人五年封爲廣惠淵靈威佑侯龍母  
爲慶善薦福夫人

至元嘉禾志

明去侯爵稱陳山之

神崇禎五年重建稱顯濟廟俗名陳山寺

乍浦志

國朝嘉慶二十四年夏大旱副都統默爾格訥率理

事同知周鎬步禱有應二十五年副都統與平

湖縣紳知縣劉潮路守管捐廉俸重修咸豐十

一年燬同治十年重建

光緒嘉興府志